

Na temelju čl. 21., 62., 65., 67., 68., 72., i 139. Zakona o veterinarstvu ("Službene novine Federacije BiH", broj 46/00), federalni ministar poljoprivrede, vodoprivrede i šumarstva, donosi

## UPUTSTVO

### **O POSTUPKU I NAČINU IZDAVANJA RJEŠENJA O NEPOSTOJANJU VETERINARSKO-ZDRAVSTVENIH SMETNJI ZA UVOZ I PROVOZ POŠILJAKA ŽIVOTINJA, ŽIVOTINJSKIH PROIZVODA, POŠILJAKA ROBA KOJE SADRŽE SASTOJKE ŽIVOTINJSKOG PODRIJETLA I DRUGIH PREDMETA KOJIMA SE MOŽE PRENOSITI ZARAZNA BOLEST ILI UGROZITI ZDRAVLJE LJUDI I ŽIVOTINJA**

#### Članak 1.

Ovim uputstvom propisuje se postupak i način izdavanja rješenja o nepostojanju veterinarsko-zdravstvenih smetnji za uvoz i provoz pošiljaka životinja, životinjskih proizvoda i drugih pošiljaka roba koje sadrže sastojke životinjskog podrijetla, pošiljki sjemena za umjetno osjemenjivanje životinja, oplodjenih jajnih stanica, jaja za nasad, hrane za životinje, sirovina i aditiva koji služe za proizvodnju hrane za životinje, lijekove koji se upotrebljavaju u veterinarstvu, i drugih predmeta kojima se može prenositi zarazna bolest ili ugroziti zdravlje ljudi i životinja.

#### Članak 2.

Rješenje o nepostojanju veterinarsko-zdravstvenih smetnji za uvoz i provoz pošiljaka iz članka 1. ovog uputstva izdaje se na osnovu podnesenog zahtjeva. Podnesak se podnosi na propisanim obrascima koji su sastavni dio ovog uputstva.

Obrascu izdaje Federalno ministarstvo poljoprivrede, vodo- privrede i šumarstva (u daljnjem tekstu: Federalno ministarstvo).

#### Članak 3.

Podnesci se podnose u dva primjerka od kojih jedan ostaje stranci s čitko upisanim podacima, ovjereni pečatom firme i potpisani od strane odgovornog lica. Podaci koji se navode u podnesku moraju biti istovjetni sa podacima iz dokumenta na koje se odnose.

Uz podnesak uvoznik prilaže sljedeće dokumente u originalu:

- mišljenje nadležnog veterinarskog inspektora o objektima i odgovarajućim skladišnim kapacitetima za uskladištenje i smještaj količina roba navedenih u podnesku, ukoliko objekat nije registriran od strane Federalnog ministarstva;
- mišljenje nadležnog veterinarskog inspektora o ispunjavanju uslova za karantimiranje pošiljaka koje podliježu karantinu, sa podacima o kapacitetu objekta za smještaj pošiljaka navedenih u podnesku;
- zapisnik/zapisnici o izvršenom veterinarsko-zdravstvenom pregledu pri istovaru uvezenih roba iz prethodnog rješenja;
- rezultat/rezultate analize ovlaštene laboratorije o higijenskoj ispravnosti/neispravnosti uvezenih roba iz prethodnog rješenja ukoliko je nadležni veterinarski inspektor uzeo uzorke za analizu;
- rezultat ovlaštene laboratorije o dijagnostičkom ispitivanju izvršenom u karantinu uvezenih roba iz prethodnog rješenja;
- rješenje o zatvaranju karantina roba iz prethodnog rješenja izdato od kantonalnog organa uprave;
- dokaz o uplati federalne administrativne takse u iznosu od 150 KM-a;
- federalne administrativne markice u iznosu od 5 KM-a;
- po potrebi i drugi dokumenti.

#### Članak 4.

Pored dokaza navedenih u članu 3. ovog uputstva u slučaju podnošenja podneska za uvoz sjemena za umjetno osjemenjivanje životinja, potrebno je priložiti i dokumentaciju o izvršenom progenom testiranju bikova čije se sjeme namjerava uvesti.

#### Članak 5.

Kada se radi o uvozu životinja namijenjenih rasplodu, uvoznik je dužan obezbijediti mišljenje Federalnog ministarstva - Sektor za poljoprivredu, o podrijetlu, proizvodnoj i priplodnoj vrijednosti, jer se može uvoziti samo kvalitetna i elitna priplodna stoka ili dokaz da se radi o projektu od interesa za Federaciju BiH ili kanton.

#### Članak 6.

U slučajevima kada uvoznik nije vlasnik već iznajmljuje odnosno uzima u zakup klaonice, skladišta i druge objekte, u obvezi je da priloži i ugovor o zakupu objekta.

#### Članak 7.

U podnesku za izdavanje rješenja uvoznik može zahtijevati samo jednu zemlju izvoza robe, te samo jedan granični prijelaz za uvoz, a za provoz i granični prijelaz izlaska pošiljke iz članka 1. ovog uputstva.

#### Članak 8.

Ako se radi o uvozu lijekova koji se upotrebljavaju u veterinarstvu potrebno je uz podnesak priložiti i specifikaciju roba u slijedećoj tabeli:

Red. br.	Naime-novanje	Tarifni broj	Tarifna oznaka	Stopa carine	Jed. mjere	Količina	Vrijednost robe u KM

#### Članak 9.

Rješenje o nepostojanju veterinarsko-zdravstvenih smetnji za uvoz i provoz pošiljaka navedenih u članku 1. ovog uputstva važi 60 dana od dana donošenja rješenja.

#### Članak 10.

Rješenje o nepostojanju veterinarsko-zdravstvenih smetnji za uvoz i provoz pošiljaka navedenih u članku 1. ovog uputstva Federalno ministarstvo izdaje u roku od osam dana od dana podnošenja podneska.

#### Članak 11.

Ovim uputstvom prestaje da važi Uputstvo o postupku i načinu izdavanja rješenja o nepostojanju veterinarsko-sanitarnih smetnji za uvoz i provoz pošiljaka životinja, proizvoda, sirovina i otpadaka životinjskog podrijetla, hrane za životinje, lijekova koji se upotrebljavaju u veterinarstvu, sjemena za umjetno osjemenjivanje životinja, oplođenih jajnih stanica za oplođivanje životinja i drugih predmeta kojima se može prenositi zarazna bolest ("Službene novine Federacije BiH " br. 10/97, 21/97, 3/00 i 42/00).

#### Članak 12.

Ovo uputstvo stupa na snagu narednog dana od dana objave u "Službenim novinama Federacije BiH".

Ministar  
**Behija Hadžihajdarević, v. r.**